

04 FEB 2000

RAILEY TAWAR DIRI TANDING MT UMNO

KUALA LUMPUR, 4 Feb (Bernama) -- Bekas Timbalan Menteri Kerja Raya Datuk Railey Haji Jeffrey hari ini menawarkan diri untuk menjadi calon bagi merebut kerusi Majlis Tertinggi (MT) Umno pada pemilihan parti Mei ini.

Railey, anggota Parlimen kawasan Silam, berkata beliau berhasrat menawarkan khidmat kepada parti di peringkat MT khususnya bagi mewakili suara dan kepentingan anggota Umno di Sabah.

Ini merupakan kali ketiga beliau bertanding bagi merebut satu daripada 25 kerusi MT. Beliau gagal pada 1993 dan 1996.

Railey menyambut baik Kod Etika Pertandingan yang diluluskan oleh MT semalam dan berharap ia akan dipatuhi oleh semua pihak demi kepentingan dan perpaduan parti.

Perdana Menteri yang juga Presiden Umno Datuk Seri Dr Mahathir Mohamad semalam berkata kod itu antara lain membenarkan kempen tetapi melarang sekeras-kerasnya sebarang bentuk politik wang atau penyalahgunaan kuasa.

Dengan penawaran diri Railey, Umno Sabah dijangka menampilkan enam calon bagi pemilihan MT.

Ketua Menteri Datuk Osu Haji Sukam, Timbalan Menteri Pertahanan Datuk Shafie Apdal dan bekas Ketua Menteri Datuk Salleh Tun Said telah menyatakan hasrat mempertahankan kerusi yang dipegang mereka.

Sementara itu, Menteri Tanah dan Pembangunan Koperasi Tan Sri Kasitah Gaddam dan Timbalan Ketua Menteri Datuk Seri Panglima Lajim Haji Ukin juga telah menyatakan hasrat untuk bertanding.

-- BERNAMA

MNY NAK